

石雲山人文集

石雲山人文集卷一

經進文存 賦 文 制誥 論 對 摺序

呈

南海吳榮光伯榮

擬潘岳藉田賦

以題爲韻  
癸亥大考

運啓典午道隆泰始豐戊首春吉亥御晷百穀兆穰三  
靈備祉頒明詔以躬耕曰古禮之是擬戒百官於東郊  
修千畝於洛中言農祥其旣正兮又土膏之方起於是  
封人壝官方神平坻風伯清塵雨師汎軌播植之器告  
虔種稔之種維美望屬車於紺轅載農輿於黛耜乃乘

大輅鳴和鑾九旗日月十乘龍鸞雷動萬轡景從千冠  
衝牙鎗其應節方綵簇其揚竿車隱軫以膏棘馬騰趯  
而飲潘叅塗掃翳方駟迎安遐阡繩直邇陌綺攢飄冷  
風之荏苒泛清馴以瀾漫至則未舉夫三推之典也而  
先告虔祀於農壇禮官整儀太常協樂肇禋惟精致敬  
惟慤杳澄慮於綈帷穆棲神於絳幄民事勲拳天容沖  
邈祝九穗之降康合千畦而普渥看井瀆之縱橫仰天  
池之灑潯艱難繪幽和甘調節敘告雨暘歡騰川岳願  
匪今而斯今兮歌甫田於彼倬乃降靈壇臨廣場信調

手於洪縻念習勞於青幘御耦告備三推而釋班五九  
於公卿助普存於主伯扶耒成林醴流爲澤杏花菖葉  
之村壤嬰衢童之陌合南畝之腴賦與東臯之穰穰莫  
不朋悅曹怡攝踵接跡而言曰遐哉乎天子之敬念農  
時而躬修帝藉也乃有學士大夫揚摧而稱曰夫藉事  
原后稷廢自周宣侯載詳於月令典并重於祈年下以  
勤乎民上以敬乎天俾倉箱以足國潔簠簋以奉先義  
取助而取借事至備而至全今也在豐念匱夙駕稅田  
勞此日之宵旰廛前民之艱鮮洵六府之至要實八政

之大權於以見升香普淖而錫福綿延也懋典旣舉爰  
回天步勞酒斯命四海大酺越日戊子遂赦天下以順  
陽春之布微臣謏陋敢慚獻賦並糸頌曰惟天愛民豐  
年屢兮惟聖勤民粢盛具兮膺膺周原駕木輅兮東田  
三反急先務兮酒醴以蒸神無數兮室家以盈民無忤  
兮一遊一豫諸侯度兮於萬斯年永國祚兮

聖駕臨幸翰林院恭紀文

并引  
代劉諸城相國作

嘉慶九年歲次甲子春二月三日

聖駕出東長安門

幸翰林院親王大學士暨由翰林出身之九卿科道及翰林官凡二百有六人從

駕臨先謁

孔子於院東祠所次開宴於稽古論思堂從官咸侍樂陳三部宴畢

賞賚

御製味餘書室集及九家注杜詩石硯箋紙文綺各有  
差恭遡

高宗純皇帝以乾隆九年甲子

幸院今逢紀年與歲舍均相符合

上遵

成憲命仍以唐臣張說東壁圖書府五言律詩爲韻

御製敬依

高宗純皇帝元韻賦東字音字二章

詔選三十八人各分一韻賦詩又

念人數爲字數所限復爲柏梁體

御製首句俾諸臣以次聯吟

臣

竊惟乾隆甲子

臣

父統

勲以都御史與

宴賦詩茲

臣壻

復以大學士恭逢

鉅典兩代先後得與賡颺之盛感激忭悅謹撰文一篇  
恭系以頌以導揚

皇上繼

志述

事之極則詞曰翳惟邳運初開河苞洛符處空是造軒



象是圖懿放唐懋重虞明良其歌時幾其謨遐哉復乎  
自罕漫旣祛以來繩契筌緒宛渾煦蘊紛縕頒斌烏奕  
昭蘇爰暨五德可得而權輿矣易曰觀天文以察時變  
觀人文以化成天下由斯以談貢肇於妣頌存乎子姬  
有柱下之史漢有金馬石渠之署逮乎李唐翰林實始  
臣愚以爲鴻業之色雍容掄揚實抒下情然非德懋功  
著不足以垂爲頌聲故被四表者必曰欽明敷四海者  
必曰祇承非直爲發榮號保鴻名而已蓋凝神儲精之  
中昭明寅畏將以宏亮前憲顯融至道覃醇襲豫以慶

成故漢頌無大功德而唐宋之文治不足稱焉

聖清集

大命撫九宇肇基西山毓祥東土武功暨定文運丕著  
實邁乎三古是以

盛京肇建文館我

太宗有國史宏文秘書之設迫我

世祖綏定中土爰制翰林之秩

聖祖

世宗教養並率蓋數百年來覆露照導融乎若月昭乎

若日四海之內聲翔澤油雲布霧溢以迄於今日也

皇帝上聖膺運

重華協極遠稽天疇近述

祖則明

昊虔察

祇格

臨雍

尊

師

經筵講德

舊典循乎秋獮

慶賚舉乎春藉先是楚蜀旣靖天下邕熙扶杜之帥采  
芑之師皆脫劍歌愷建纛受釐懷生之物蒸蒸慕思游  
沈沈式疊疊衍喜愉悅以仰戴乎

辰居於是

天子穆然動容淵然深思曰惟

天惟

祖

考所俾予以文治者予不敢懈予願與諸臣庶宜之恭  
迺

高宗純皇帝九年甲子

幸翰林院丕奕洪誕光昭來禋

典至鉅

恩至備也今我

皇上初日接旦撓甲重臻載懋

上儀爰諏中春信鴻藻通駿文天導地和羣歡畢臻誕

緝熙之盛業答

啓佑於昌辰於是縉紳之士黼黻之倫咸昭景融化含和而吐氣嘆曰盛哉乎

聖天子之稽古憲章迂衡召福侯其玉朗而鈞振也是日也霽雲爛祥曦瞰六合旣朗時風載暄

翠華莅止揚光飛文乃謁

先聖曰維明禋乃

表雙題曰維作人乃

臨高軒陽融露溫開嘉宴庸展親渥九列逮羣臣

韻東音而章筠聯柏梁而情均禮縵之慶瑰喬彪蔚羌

莫得而殫陳焉夫

祥符景運戎纘

洪猷

至孝也

國尙

師位禮崇六拜

至教也頒

寶函八集與十三經並儲

至文也

帝庸作歌下逮詞臣

至敬也

奎畫用勝以最多士

至盛也儉爾籩豆肆筵胥樂

至仁也愷宴旣周

錫予普汜

至慈以均也當此之時衍神垓而浹德光

寶業而集禧曜合緯汁雲潤星輝璿幹照於九壤珠囊

煥於四時方將



宵旰兢業虔勤勞謙鑒無曠於虞書所無逸於周篇緒  
前謨於丕顯憲廣運於中天揚洪懿垂雅頌以至於萬  
斯年煌煌乎觀文成化之烈其疇能宣之哉敢拜手稽  
首而獻頌曰於鑠

聖清光天之下肇啓

文明照於函夏莫敢不陶莫敢不治曰惟

聖祖

神宗俾予純嘏

其一

高宗受命躬秉

文德維歲闕逢載觀圖籍鬱乎翰林玉河之側六宿翊

躔五星同色

其二

皇帝曰咨丕承

文思自我

烈考貽譽昭來越六十年景祚重離維予一人其憲於

茲

其三

乃

命司空乃集將作爰經爰營爰究爰度曰維新之肯其

式廓甲觀巍巍麗於丹雘

其四

乃諏吉亥惟仲之春肅肅

日馭粲粲星陬葩瑤容裔儀鎧殷麟

皇帝莅止穆穆旻旻

其五

惟院之東

孔子之堂

皇帝躬祀奏假升薌俎豆孔碩禮樂是皇惟

君師合揆厥道大光

其六

乃

御寶座祥和輻輳濟濟趨踰戔戔左右衆拜稽首

皇帝萬壽

皇帝曰俞與諸臣懋其七

秩秩嘉筵惟

帝之賜司儀掌之旣戒旣備敦葦

恩覃涓簫

澤洎

皇帝曰都與諸臣暨其八

樂部載陳崇文攷實瀛洲數典昆明灑筆尙稽房杜庶  
幾儒術

皇帝曰吁與諸

臣述

其九

倬彼

天翰爲章卿雲歌舜以起協堯以文宏於光華順晷及

辰

皇曰勉哉與諸

臣臻

其十

唐音分韻漢製聯詩至於吉士靡或有遺以賡以颺以

泳

聖涯

皇曰念哉與諸

臣怡

其十一

懿彼璇楣

奎文雙麗日月高懸龍鸞森衛天祿甄陶清華品第

皇曰勗哉與諸

臣勵其十二

八集黼黻石經同錫言炳丹青道符啓迪莫不含泳四

和四極

皇曰敬哉與諸

臣式其十三

爰有

蕃賚翠蘊

宸章琉璃之匣雲錦之囊莫不遍逮惟璆琳瑯

皇曰溥哉與諸

臣慶其十四

非惟慶之惟

帝文彰之非惟彰之

帝德丕揚之明明

憲典惟

帝光之赫赫

盛業

帝用康之

其十五

微臣

矢音書之簡牘藻繪

天中襲軒旦復大哉

化宇彬彬郁郁

皇敬受之長膺嘉福

其十六

甲子正月過潘芝軒少宰師師手一巨觥謂余曰  
適從劉諸城相國師第來師命巨觥以事託我  
今亦有事託汝汝諾我卽盡此觥然後言所事余  
爲引滿則爲諸城相國代筆也遂擬此篇以進

榮

光  
記



恭擬

裕陵興工祭告文

山封昌瑞感神功聖德以俱長殿榜隆恩合春露秋霜  
而永奠靈於昭乎陟降葱鬱珠邱神如在以憑依森嚴  
玉座閱歲時而用妥宜棟宇之重新敬告雕筵奉移寶  
祐吉蠲蒞事蕭豆潔而籩馨丹雘施工佇雲輝而藻煥  
式新楹於勝水精禋集百福之祥瞻壯構於崇阿佳氣  
擁三靈之衛仰祈歆格曷罄瞻依

恭擬

裕陵后土祝文

神峪靈閼聖水流長天作高山奠麗永康鳩工相土敬  
告馨香三辰叶順百靈效祥神其鑒之錫祉無疆

恭擬

三壇祈雨祝文

朕率育承天爲民請命冀二時之普力玉燭調嘉厯百  
穀以祈膏金穰兆稔惟神位參化育權統蒞敷上帝之  
德好生誠孚感召下民之天惟食依念艱難省歲情殷  
劭農心切邇時雩於靈壇精禋已越乎三旬承昊貺於  
齋宮闔澍快資乎連夕邇者節過登麥序屬宜禾瞻爨  
鑿之重陰方霑有泔灑零露之甘液僅沐其濛芒種關  
心憫一犁之未透蕤賓應律念千畝之其耘雲屢布乎

郊圻澤待滋乎畿甸詣靈潭而修祀已告先期籲崇墀  
以升馨載祈休祐伏願神漿疊沛豐澤洪施帝用錫乎  
明昭氣相通於呼吸有開先者曾邀霽霖霏甘又潤澤  
之佇卜霽霽布渥當河流之永翕引渠豐衣食之源占  
斗運以方興荷鍤盡溝塍之利歆茲吉饍貺以順成

恭擬

三壇謝雨祝文

帝德好生闡澤拜明昭之賜天心奉若精禋感呼吸之  
通召太和而誠禱斯符答洪貺而敬修彌切比以節過  
小滿時屆長贏祇雩祀於齋宮曾邀霽霽占農功於皋  
月已沐靈霽惟潛滋助麥之漿兼漑潤養禾之土澤祈  
繼霈念夙知依蠲吉日而詣靈湫躬申虔籲遣親藩而  
肅崇壇甫告馨升乃一氣之潛孚遂千脰之遍透合霽  
軸雲輪而默運普汜無私迓兩車風馬以偕來渥霑至

再叶庶徵而曰肅長萬物而占豐衆綠蕃滋問序則剛  
逢芒種羣黎解阜吹風而恰應蕤賓大地飛甘甫田滲  
液庇嘉穀而翳神是賴自天降康報庥祐而非朕敢私  
爲民錫福伏願興雲應候運斗知時望並慰乎九農期  
同符於十日澤下尺而苗上尺長宣夏假之恩平再登  
而泰三登預卜秋成之稔歆茲蠲潔錫以綏豐謹告

恭擬

中嶽嵩山祭告祝文

鎮地宅中配天表峻協兩儀而布序總四方而稱高土  
德鍾祥萃靈光於二室房星應朗靖氛禳於三川茲以  
川陝楚邪黨肅清洪庥丕著惟師行之貞吉皆神德之  
順承肅祀典以欽柴慶普豕韋之地奏凱章而返旆歡  
騰鶉首之墟敬遣專官惟歆禋祀

恭擬

西嶽華山告祭祝文

鎮翊雍垠躔分井絡並少陰而敦物配太華以昭靈兌  
澤宣仁洗甲効風雲之順皞金受職銷兵騰日月之光  
茲以三省戴功八方同慶惟洪庥之默相俾邪禳以廓  
清氣擁神皋百二關之凱歌齊入歡臚福地十七峯之  
露布遙傳敢告明禋惟歆秩祀



恭擬

羣祀四節祝文

清明

榆火節新桐花序始式薦時羞尙歆明祀

中元

節逢蘭月禮舉蕭辰爰頒祀典雕俎載陳

冬至

舒陽叶候亞歲迎祥潔茲籩豆鑒此馨香

歲暮

葭琯臘殘椒盤歲易用展苾芬庶幾歆格

非先王之法言不敢道

嘗考唐虞之世詢事考言又曰敷奏以言人臣請共爾  
位其所以勤勵翼而備采納者言可苟焉而已哉當嘉  
言罔伏之朝而欲少有建白則平生之學術係之卽一  
心之誠僞見之如經言卿大夫之孝曰非先王之法言  
不敢道其所以爲臣道訓者備矣夫人自策名委贄以  
後修之家而獻之廷者先資所由拜獻也拾其遺而補  
其闕者嘉謨之所以入告也盡其職卽所以保其家也  
伊昔盛時都兪吁咈交做一堂禹有九功惟敘之言臯

有九德有常之言以至伊則有訓且則陳書君明臣良之會言皆可續事皆可法非所謂先王之法言哉蓋觀於正德厚生之董戒則知後世重農貴粟之奏不足言也蓋觀於惇典庸禮之懋勅則知後世治性正家之疏不足言也抑觀於顧視明命所其無逸之告則後世十思十漸之論不足言也非然者徇私而不本乎法則敬事後食之義不講矣偏倚而不衷乎法則窮理格物之用未至矣戇直而不凜乎法則積誠上格之學不聞矣享康祿之厚職獻納之司而顧旅進旅退人云亦云所謂

能教忠者安在哉卽所謂保其家者安在哉夫盛明之  
世不廢芻蕘對揚之體要惟敬慎爲人臣者所當書思  
對命劾片言之可采以求合於夙夜匪懈以事一人之  
義也

察吏對

考御史

考績者朝廷黜陟之大柄也百揆以之而敘庶績以之而熙所謂敷奏以言明試以功車服以庸者是也顧歷代考課之法不一惟得其人以行之則人以法立可歷久而不弊周官三載考績三考黜陟亦猶唐虞之制所謂九歲而大考黜無職而賞有功也三歲而小考正職而事行也漢京房作考功課吏法晉灼曰以令丞尉理一縣崇教化亡犯法者轉遷其有盜賊三日不覺令覺之尉負其罪率相準如此法時議者皆以爲瑣碎不可

行惟鄭宏周堪善之杜預謂魏氏考課卽京房之遺意  
後竟不行其實魏晉以後言考課者皆京房法也魏劉  
劭作郡官考課七十二條考覈百官杜恕疏言州郡考  
功皆有事効然後舉察郡守以功補過或就增秩至公  
卿內職大臣不當但以其職考課晉杜預黜陟課唐之  
四善二十七最九等本此二十七最者始獻可替否拾  
遺補闕爲近侍之最終邊境肅清城隍修理爲鎮防之  
最是也又有請委達官各考所統在官一年以後每歲  
言優者一人爲上第劣者一人爲下第如此六載優者

遷擢之劣者奏免之歷代以來考課愈繁則吏道愈雜  
所謂徒有其法而得人以行之者終鮮蓋人以法立亦  
法以人立善乎杜恕之言曰若使法可專任則唐虞不  
必稷契之佐殷周無須伊呂之功所以致嘆於有治人  
無治法也夫天工人代曠官之戒交勵虞廷考之者所  
以儆百工之惰也所以懋庶事之康也我

國家課吏之法至隆且備三載考績政懋唐虞

皇上訓飭吏治澄敘官方大吏有考課之責莫不公正  
勤明羣吏奉考課之法莫不奉公潔已所由師師濟濟



吏治日隆六府克修三事允治也

嘉慶丁卯科浙江鄉試策問

問古言帝王治道曰兢兢業業曰克勤克儉後人謂堯  
捐金舜捐璧禹飯一饋七起此外可畧舉歟後漢書言  
周康王晚朝關雎作諷或又謂庭燎以箴宣王其說何  
據漢文帝集上書皂囊爲帷厥後師其意者何人光武  
數引公卿郎將廣求民瘼而漢制五日一聽事說者謂  
法不如古何也漢文帝節儉與元帝節儉得失安在唐  
高宗停貢珠寶元宗焚珠玉錦繡事在何年唐內殿無  
逸圖昉於何帝宋寶元耕織圖繪設何地皇祐無逸孝

經圖書自何人或謂唐無逸宋耕織圖後皆易以山水而勤怠判焉何說箴誠之興尙矣自堯戒武王衣銘外唐德宗君臣箴宋太宗欹器銘其說何指漢揚雄官箴唐李德裕御臣要畧其書存否可畧數歟我

皇上躬行節儉政勅時幾

御製節以制度論

勤政殿記

勤政箴以勵臣工而風天下諸生對揚有志曷不稽諸古以備采焉

問文章總集自摯虞文章流別始見隋經籍志第開先  
者何書取正者何本唐志丁部總集七十五家後附文  
史翰林論等四部或謂體例未安見何說七十五家內  
如善文文苑詩苑英華及賦頌啓七等集能舉撰人姓  
名卷數多寡與隋志中興書目異同否昭明文選唐時  
續擬者何人宋文苑英華托始梁末蓋以續文選其優  
劣安在至一代之文則有西漢文類東漢文類晉代名  
臣文集及明梅鼎祚皇霸文紀等編以當代人集當代  
之文則有唐元和御覽河嶽英靈中興閒氣宋續中興

制草元天下同文集等書其得失何據唐文粹宋文鑑  
元文類爲一代善本後人猶有異議至宋文鑑則張栻  
之論與朱子不合何也我

朝文運昌明黼黻潤色於

皇清文穎觀其盛上年業奉

旨續纂又

欽定熙朝雅頌集崇忠愛黜纖靡諸生讀書稽古將以  
文章報

國盍詳考以對

廣東博羅永安二縣給籽種謝摺

奏爲恭謝

天恩事本月十九日內閣抄出奉

上諭倭什布等奏請將博羅永安二縣從前被難民戶  
賞給籽種一摺該處會匪滋事業經搜捕淨盡所有會  
經被擾之區前已給賑卹及經費銀兩自可漸臻甯謐  
現當春耕之候著加恩賞給籽種俾耕作有資以示朕  
加惠窮黎至意欽此欽惟我

皇上春臺播闢

泰宇勻禧

調玉燭於四時令序啓舒長之日

肇金穰於六幕休徵洽豐靖之年

九功之德可歌雨暘叶順

八政之條首食稼穡

知艱溯粵東遐僻之區值匪黨肅清之後曾

諏壘吏

頒賑卹於茅簷更奠編氓

厘鞠謀於蔀屋我倉我庾普

殊恩而丁盡歸農爾宅爾田樂恆產而卯方于耜固已  
共安作息咸荷

生成乃

德屢普而有加

澤載敷而靡匱念兩縣民居甫乂家鮮餘糧而三時農  
事方興戶均給種豈春耕之不足實歲

省之維殷

巽重以申孚惠心於

黼座豐懋以戊降嘉種於青疇平再登而泰三登冷風



告熟澤下尺而苗上尺協氣流春

臣等拜

賜鄉閭依

光禁近捧

絲綸而率忭先猷畝而臚歡憶春及於江鄉萬家載柝  
占秋成於澤國四鬴翻匙喜益下而

恩稠仰

建中而

福錫灌輸者大不遺海溼山陬

甄陶在和共慶寰通宙洽佇見甘霖沛渥扈序協而樂

歲含醇咸欣薄海恬波

鴻庸蕝而康年篤祐所有

臣

等感激下忱理合繕摺恭

謝

天恩

准給假省親謝

恩摺

雲貴總督長齡填諱

奏爲奉到

恩旨賞准給假省親謹瀝陳感悚下情恭摺叩謝

天恩事十月二十一日

臣

在護理貴州巡撫任內准吏

部咨開道光五年十月初一日奉

上諭蘇明阿奏藩司呈請給假省親一摺貴州布政使

吳榮光著准其開缺賞假四個月回籍省親欽此

臣敬

聆

恩旨感激涕零當卽恭設香案望

闕泥首叩謝

天恩伏念

臣

嶺表庸愚毫無知識渥荷

聖慈稠疊洊擢貴州藩司護理撫篆半載有餘本年九月復蒙

恩命再護巡撫卽捐糜頂踵不足以仰効涓塵昨以親

父候補教諭吳濟運年老多病思子念切援照京官省

親之例由前撫

臣

代奏請假四月回籍省親

臣

以將父

情殷妄希

曠典日夕瞻望悚懼難安乃荷

皇上高厚鴻慈

俯鑒下情俾得開缺歸省凡此

微臣

難期之願悉蒙

聖主逾格之施七十五歲之老親

生成曲逮一十六年之遠宦定省方償戴

天而盡物欣私伏地而舉家啣結現在護任內一切事

宜

臣

惟有殫竭心力倍矢驚鳶認真整飭不敢稍形疎

懈俟新任撫

臣

嵩溥到黔再行交卸

奏報起程回籍所有

微臣

頂感下忱謹繕摺叩謝

天恩伏乞

皇上聖鑒謹

奏

加兵部侍郎銜謝

恩疏

題爲恭謝

天恩事伏念

臣

嶺表寒微知識謏陋荷蒙

恩簡畀任封圻夙夜撫衷冰兢方凜茲復仰邀

異命

特予兼銜職旣重乎中樞竊幸分榮省闕官甫襄乎武  
部尤當整旅戎行沐

恩階之愈隆銘心版而彌切

臣

惟有恪思兼職勉矢丹

誠訓標下之兩營悉成精銳率楚南之列校同答  
昇平并於巡撫本任糾察官吏撫馭苗民隨事隨時實  
心經理以期仰報

高厚鴻慈於萬一所有微臣感激下忱理合恭疏

題謝

天恩謹具題

聞



賞福字鹿肉謝

恩摺

奏爲恭謝

天恩仰祈

聖鑒事

臣在永州府城摺差齋到

御書福字並鹿肉一分

臣當卽出郊跪迎至行署恭設

香案望

闕叩頭祇領伏念

臣屢荷

鴻慈久叨參養甫膺疆寄暫履戎行退食懷慙進思無

補茲屈青陽令紀復承

紫禁

恩頒品分麀鹿之珍

福集龍鸞之勝題欽

奎畫用敷願遍乎三湘脯出

天厨拜

賜敢忘乎每飯

寵優逾分感幸難名

臣

惟有推

慶賞以及民荅

昇平而率屬迂

嘉祥於有土春到西南捧鮮味之盈筐

天瞻咫尺

錫備箕疇康富佇徭境之胥匡樂均芴野和耽聽楚歌

之旋凱所有

微臣

感激榮幸下忱謹繕摺具

奏恭謝

天恩伏乞

皇上聖鑒謹

奏

賞福字鹿肉謝

恩摺

奏爲恭謝

天恩仰祈

聖鑒事道光十三年正月十六日臣齋摺差弁回楚捧  
到

欽賜

御書福字并麀鹿肉一分當卽出郊跪迎至署恭設香  
案望

闕叩頭祇領欽維我

皇上福集蘿圖

恩覃苹野

天筆錫蒼生之祉遠及西南

仙廚頒上品之珍普霑中外臣忝膺守土再沐

殊施

澤應歲以方增慶隨春而並至癸爲揆度占年計麋賸  
之豐已啓文明近

日捧

龍章之煥與萬姓受釐伊始宣布維殷荷

九重賜脯之榮薦嘗彌切甘分宸采喜溢衡湘所有

微

臣感激榮幸下忱謹繕摺恭謝

天恩伏乞

皇上聖鑒謹

奏

賞福字鹿肉謝

恩摺

奏爲恭謝

天恩仰祈

聖鑒事道光十四年正月二十一日

臣

齋摺差弁回楚

捧到

欽賜

御書福字并鹿肉到境當卽郊迎至署恭設香案望

闕叩頭祇領欽維我

皇上九寓勾禱

萬年徧德甲逢元幹用敷

錫泰運之祥午正

當陽咸若紀春田之化

行慶首頒新歲割鮮遠逮

微臣

自莅邊隅三蒙

渥賜捧光華於

日月彩煥

龍章沐

膏澤於釜錫珍逾麟脯豫計賓興秋榜得人賡萃野之



三况當

帝普春祺率土被箕疇之五懽並臚乎湘嶽心益凜乎

旦明所有

微臣

感激榮幸下忱謹繕摺恭謝

天恩伏乞

皇上聖鑒謹

奏

長子尙忠得儘先補用謝

恩摺

奏爲恭謝

天恩仰祈

聖鑒事

臣

長子吳尙忠捐納通判以道光九年分發江

蘇試用茲恭閱邸抄兩江督

臣

陶澍等奏查明辦理賑

務勞績人員懇請獎勵一摺奉

上諭試用通判吳尙忠著以本班儘先補用等因欽此

臣

跪聆之下感切兢惶當卽恭設香案望

關叩頭敬謝

天恩伏念

臣

家本蠶鹽業慚弓冶

臣子

尙忠讀書僅知

點畫進考屢躋科名濫廁捐班甫經三載茲以江蘇辦賑仰蒙

皇上天恩以本班儘先補用念此卑微之秩總荷

生成錄其奔走之勞俾先敘補一經未守惟策名而教之忠兩世承

恩幸及時而思自効捐糜永矢悚感難名

臣

惟有勉竭

愚蒙益勤職守並寄囑

臣子

尙忠盡心學習隨時隨事

潔已奉公以冀稍酬

高厚鴻慈於萬一所有臣感激奮勉下忱謹繕摺具奏

恭謝

天恩伏乞

皇上聖鑒謹

奏

欽頒平定回疆勦擒逆裔方畧謝

恩摺

奏爲恭謝

天恩事

臣

齎摺差弁回省仰蒙

恩賞

欽定平定回疆勦擒逆裔方畧一部當卽跪迎至署恭  
設香案望

闕叩頭祇領欽惟我

皇上鴻華幾勅

軒武福成掃苞蘄而復四城

天聲有赫繫渠魁而來萬里

廟算無遺

神策十條授鉞作風雲之氣師期一載撥麴迅霆電之行聽合陣以歡呼嚴圍鐵蓋傳迎年之吉語生縛兜題紅旗報而六合同春

丹陛開而萬方送喜獻俘旣舉乎

上典紀事用纂以成書八十卷

顯謨承烈之閤文春秋

筆削三萬軍錫節諄和之闔樂

宵旰精神

臣

幸際

昇平榮叨

頒賜當觀成而同慶謹熟讀而深思推

順信所助之由仰窺

巍煥繹

訓練無忘之誠益勵操防所有

臣

感激榮幸下忱謹繕

摺恭謝

天恩伏乞

石雲山人文集

卷一

四

皇上聖鑒謹

奏



捐賑議敘謝

恩摺

奏爲恭謝

天恩仰祈

聖鑒事

臣

恭閱邸抄兩廣總督

臣

盧坤等奏廣州肇慶

兩府被水紳民捐輸賑糶一案道光十五年四月十三  
日內閣奉

上諭現任湖南巡撫吳榮光雖據該督等聲明大員不  
敢邀獎仍著交部照例議敘等因欽此

臣

伏讀之下慚

棟難名當卽恭設香案望

闕叩頭敬謝

天恩伏念

臣

受祿多年離鄉六載偶遇枌榆之小歎難

安席履之獨豐念

朝廷參養之身久糜廩餼俾官舍贏餘之積寄助輸將  
況故里撫卹兼施已普

天慈而登餽衽而

微臣

俸廉過厚祇分

君賜以及鄉閭義應有以相賙

澤敢希乎非分乃蒙

皇上恩綸下逮甄敘仍加粟絲皆出匪頒詎云推解  
雨露各欣均被總荷

生成問訊粵山告上稔而咸歌

帝力守官湘水感

新恩而益矢臣心

臣

惟有倍勵廉隅時深警惕於率屬

安民等事任勞任怨加察加勤力挽頽風振除積弊凜  
廢弛之甚易竭心力之所能以稍酬

高厚鴻慈於萬一所有

臣

感激奮勉下忱理合繕摺具

奏叩謝

天恩伏乞

皇上聖鑒謹

奏

京察照舊供職謝

恩摺

奏爲

京察大典渥荷

聖恩照舊供職恭摺奏陳感凜下忱仰祈

聖鑒事

臣

准吏部咨開本年

京察將京外各大員具題

臣

奉

硃諭着照舊供職欽此當卽恭設香案望

闕叩頭敬謝

天恩伏念臣嶺表庸愚知識謏陋通籍卅七年之久總荷

天慈外任十六載之間驟膺疆寄鋤頑懲弊每虞操切以招尤性直才迂罔敢虛浮而守拙凡此臣躬之黽勉悉惟

天鑒之矜全除惡則

諭以勿受欺蒙防奸則

諭以一力整飭務實刻銘夫

訓誨捫心尤切乎悚惶茲逢三載考績之年

恩與照舊供職之列念微臣補過不暇當

考察而深用懷慚而

聖主俯照無遺荷

優容而俾知自勉

恩同再造感切五中臣惟有於本省察吏安民訓兵除

暴一切事宜勉益加勉勤益加勤不敢瞻徇不敢疎忽

務期日臻妥協以稍酬

高厚鴻慈於萬一所有臣感凜奮勵下忱理合恭摺具

奏伏乞

皇上聖鑒謹

奏



欽頒平定回疆全圖十幅謝

恩摺

奏爲恭謝

天恩事

臣

齋招差弁回省仰蒙

恩賞平定回疆全圖十幅一分當卽跪迎至署恭設香案望

闕叩頭祇領欽惟我

皇上功丕八埏

謨宣七德

神運授十條之策生縛渠酋

天聲揚萬里之威全殲苞蘖自渾巴什之攻克暨鐵蓋山之兜撿捷迅紅旗慶成

丹陛八十卷玉韜金檢已煥琅函

十一章曜合星聯首鐫

寶軸歡騰萬衆摹藻山縉野之聲勇賈三軍萃紫電青霜之氣鑄

軒庸於戰版機若風中矢繪

瀉德於舞干光同

日月臣幸

秘蘊敬釋

宸篇抒憤而大快神人在

九重猶增惕厲策勲而顯

褒忠勇俾羣工益効馳驅瞻

駿烈於萬年拜

鴻恩於三楚曷任抃頌彌切珍暉所有臣感激榮幸下

忱謹繕摺恭謝

天恩伏乞

皇上聖鑒謹

奏

胞弟彌光中式謝

恩摺

奏爲恭謝

天恩仰祈

聖鑒事竊臣接家信臣胞弟彌光本年恭應廣東省甲

午科充闈鄉試九月榜發臣弟彌光取中第三十七名

舉人臣聞信之下感慰無喻當卽恭設香案望

闕叩頭敬謝

天恩伏念臣生本鯁微學如蛾術承先人之式似率諸

弟以編摩

臣

三紀策名荷

矜全而忝膺疆寄

臣

弟九科棘舍屢蹭蹬而幸遇

賓興才實愧乎書升

恩許列乎榜末光觀

皇國慶及

臣

家伏地感深父教子共慰貽名之果戴

天恩重兄及弟同邀非分之榮輯雅豈填篋勉和聲以  
上鳴

國家之盛歌詩有棠棣被

新渥而長懷

雨露之仁進身悉荷

生成泥首總難報稱

臣

惟有恪供職守刻勵丹誠勤益

加勤勉益加勉並諄勗

臣

弟

彌光

立品積學力圖上進

以冀仰報

高厚鴻慈於萬一所有

微臣

感激下忱理合恭摺具

奏叩謝

天恩伏乞

皇上聖鑒謹

奏

賞福字鹿肉謝

恩摺

奏爲恭謝

天恩仰祈

聖鑒事

臣

齋摺差弁回楚恭捧

恩賞

御書福字並麇鹿一分

臣

謹出郊跪迎至署恭設香案

望

闕叩頭祇領伏念

臣

六載邊圻五蒙



渥賜敬憶

天顏入

覲拜

恩甫及一年茲當歲舍開祺加

貺復臨三楚

福備龍鸞之采品分麇鹿之珍慶

敷錫於南天

奎章丙煥

賚便蕃於

北闕仙脯申頌合湘灋而咸喜同春謹推

恩以安百姓歌萃芩而曾占筮仕念教忠敢負初心分

甘爰暨同僚每飯益銘五內臣惟有恭宣

行慶迎年紀嘉義之祥敬念延釐介景上

太平之雅

寵榮逾分感凜難名所有微臣感悚榮幸下忱謹繕摺

恭謝

天恩伏乞

皇上聖鑒謹

石雲山人文集

卷一

至

奏

嘉慶丁卯科浙江鄉試錄後序

嘉慶十二年六月禮臣以浙江鄉試考官請奉

旨以<sub>臣</sub>萬承風充正考官<sub>臣</sub>榮光副之<sub>臣</sub>嶺海庸愚由

嘉慶四年進士散館授職編修洊轉御史於九年蒙

恩分校順天鄉試茲復仰邀

特簡典試大邦聞

命忻感惟懼弗克勝任謹與<sub>臣</sub>承風星馳抵浙悉心校

閱得士如額爰鏤其文之雅者以

獻<sub>臣</sub>例得綴言簡末<sub>臣</sub>惟士人窮經致用而先資其言

以自獻其身者必自鄉試始非徒侈科目耀聲華而已  
將以此覘學術焉其爲文而論議卓越也者其人必博  
古通今而達於事理其爲文而訓詞深厚也者其人必  
行端誼正而優於器識蓋修辭所以居業而因文可以  
知人自漢代策對賢良而後唐之九經三傳宋之五經  
三禮學究明法等科皆以文章試士而制義一道義理  
精博體用皆備非融會乎濂洛關閩之旨貫徹乎德行  
事業之原深造乎養根茂實之功沈浸乎含英咀華之  
候則必駁而不醇醇而未化司衡者苟虛衷慎簡其或

能辨之我

朝以制義取士並及詩律經學策問

列聖相承涵濡教育海內士子莫不以清真雅正爲宗  
科目得人之盛邈乎罕覩我

皇上文治誕敷

教思廣被浙爲人文淵藪和聲鳴盛詠

德含醇斐然炳然蒸蒸日上

臣

幸操登選之事兢兢之

心竊欲於制義辨心性之淳薄於經義觀學問之淺深  
於詩律驗音聲之雅俗於策對見才畧之優絀慮其氣

之雜也則餽飭必黜慮其才之泛而濫也則虛浮必屏  
慮其趨之岐而戾於正也則險怪必除夫今日之貢士  
卽異日之官尹也今日之文章卽異日之政事也臣之  
謏陋萬不敢謂文品人品衡鑒無遺然冀得一正人卽  
爲

國家收一正人之用且裁僞體而示之正鵠其將使士  
子去浮崇雅胥歸有物有本之言庶幾風尙愈淳人心  
愈正此則司衡者簡別之責所夙夜自矢也夫

道光乙酉科貴州武鄉試錄序

道光五年歲在乙酉舉賓興典文闈旣峻九月臣奉

恩命護理貴州巡撫十月接試武闈臣循例主校謹偕

貴州提督臣劉榮慶進學政臣程恩澤冊送十六府廳

州武生五百九十六名率同提調遵義府知府臣于國

琇監試都勻府知府臣俞日烜按日簡閱有弊務除有

能務錄矢公矢慎合馬步射弓刀石中數力數分別雙

單好字號及內場默寫武經三試而決擇之得材技尤

爲超著者二十三人中式如額敬刊題名錄恭呈



御覽

臣

謹賜言簡端

臣

惟武科之設始於漢羽林期門

有以騎射選者有以勇悍選者名將多出其間至唐遂有步射馬槍翹關身材之目宋臣所議或專射格或習七書不無偏重至我

朝武闈試士之式俟其備矣先騎射以驗其挽強破的之能次步射以審其志正體直之本次弓石以決其摧堅陷陣之勇次默寫武經以覘其折衝禦侮之材本科預奉

明詔復舞刀舊制士之果敢矯捷者並得各奏爾能矣

皇上智勇天錫

表正萬邦自辛巳首開

恩榜以來五年之中三舉斯典多士沐浴

聖澤感激

殊恩莫不爭自奮揚以應風雲之會黔省東連楚粵西  
界川滇峻嶒重巒鍾傑毓秀兵力強固士氣英銳干城  
腹心之選每不乏人

臣

兩護撫篆於校閱省標營伍時

凡一切訓練守禦事宜日與將弁隊伍講求整飭俾習  
於有勇知方以收實效而固邊圉茲復幸襄

大典得觀赳赳桓桓之盛挾一搢三呈材角技

臣竭旬

日之力精益求精備益求備庶幾拔十得五上應

旁求他時將佐日益多才戎行深明大義用輦

國家久安長治之基是則

臣

區區之心所藉以自獻也

夫

道光辛卯

恩科湖南武鄉試錄序

道光十一年歲在辛卯恭逢

皇上五旬萬壽舉行直省文武

恩科鄉試文闈旣竣

臣

以湖南布政使適拜巡撫湖南

恩命例應舉試武闈屆期謹與提調監試各司道進湖

南學政

臣

岳鎮南所錄武生九百餘人同監射官長沙

協副將嵩齡考試先騎射地毯次步射技勇於合式之  
中密記雙單好字號准入內場默寫武經竭旬餘之力

悉心校閱取中二十四名如額恭繕武闈鄉試錄進呈

御覽

臣

謹颺言簡端

臣

惟尙書益稷曰侯以明之蓋以

射侯之禮致衆而論士則文武皆其選也至漢始有勇  
猛知兵勇武明法戰陣堪將謀謨諸科至唐始有武舉  
其選人有馬射步射馬槍翹關負重身材之目宋之武  
科旋置旋罷其後國至於弱富弼蘇洵謂宜選方畧有  
謀堪任將帥者司馬光謂弓馬以選士卒非所以求將  
帥其後至以學識深遠爲上等騎射兼有爲下等徒尙  
空言轉荒本業

臣

愚不敢謂然所在用人者寬其途以

收之量其才而進之也顧宋時應科之士每路多者不  
過六百人少者止百人臣溯前在貴州護理巡撫時主  
校武闈應試者五百九十餘人今湖南省應試者有九  
百餘人中林且免之材已邁前代仰惟我

朝八旗以騎射爲本務四海之士莫不爭自奮勵上應  
昌期

皇上雲漢作人金湯

簡帥邊隅之地涵沐

聖澤羣才輩出願効馳驅況楚南衡嶽英靈湘湖清淑

鍾毓所及必有堪膺將帥者出乎其間臣幸與試事於  
弓矢觀其體志於技勇覘其果毅於默寫武經考其講  
習矢公矢慎毋濫毋遺庶幾拔十得五異日或備

國家干城禦侮之寄以副

壽寓特科之選臣願與獲雋多士共勉之矣

道光壬辰科湖南武鄉試錄序

道光十二年歲次壬辰恭遇

皇上舉行直省文武正科鄉試

臣

吳榮光巡撫湖南監

臨文闈事竣武闈屆期例應主試謹與提調監試各司

道進湖南學政

臣

岳鎮南所錄武生八百餘人同監射

官常德協副將福珠洪阿公同考試先騎射地毯次步

射技勇於合式之中密記雙單好字號准入內場默寫

武經竭旬餘之力分別校閱取中武舉二十有四名如

額恭繕武闈鄉試錄進呈



御覽臣例得颺言簡端欽惟我

國家東土肇基以騎射爲本務多士涵濡

聖澤人材輩出垂二百年將畧戎行超越前代本年復  
奉

明詔整飭營伍俾無事則人懷敵愾有事則士盡干城  
況武科之設將以備

禁衛而簡將帥臣於上年

恩榜幸襄

盛典親以鈞石審定弓力不使稍有假借是以所取之

士弓十三力者上科止得其一今科竟得其九至於志正體直負重翹關之才亦日見其優竊謂武科試官與文科異文科使者銜

命而出事竣而旋棘院森嚴糊名易書憑文取錄不得與試士相接武科則疆吏當場考校技藝之優絀去取之公私不能掩人耳目登其最而衆皆知勉拔其強而弱亦知慚於轉移風氣或有微權也楚南人材淵藪養由基之一矢田疆武之三壘以及黃蓋嚴毅谷朗恩威代不乏人本年平獠一役本省不三月而蕞功隣省亦

以楚兵勝則楚才誠可用也

皇上俊乂旁求文武並重挽強破的之侶同袍偕作之  
彥林林總總莫不呈能角技上應

巍科

臣

在任兩年再與試事悉心衡校庶幾中者或無

濫遺未中者各思奮勵合內外場拔其尤者稍効以人  
事

君之責他日

大廷簡在或應專閫或備偏裨有勇知方以仰贊

聖主億萬年承平之治是則

臣

區區私忱所夙夜自矢

者爾

道光甲午科湖南武鄉試錄序

道光十四年歲次甲午

詔舉直省文武正科鄉試

臣

吳榮光巡撫湖南監臨文

闈事竣接考武闈謹與提調監試各司道進湖南學政

臣

岳鎮南所錄武生九百餘人同監射官長沙協副將

嵩齡公同考試先騎射地毯次步射技勇於合式之中

密記雙好單好字號准入內場默寫武經竭旬餘之力

先儘雙好次及單好取中武舉二十有四名如額恭繕

武闈鄉試錄進呈

御覽臣例得賜言簡端臣惟

國家開設武科所以收天下才勇以備奔走禦侮

恩至重典至鉅也然

恩出自

上而教則責其成於下臣備員巡撫襄

盛典者及此而三矣自惟少壯學射今年六十有二力  
不能挽兩石弓而志毅之準挽強之式粗知一二撫臣

臨場考校例得與多士接見臣三年以來每於考校時  
教以正志直體以求審固之法榜發時教以偕作同仇

以備偏裨之選又合武生武舉當場廣宣

聖世培養之厚教以有勇知方大義以作多士之氣三  
科以來上科所遺能率教者往往下科獲進由是而知  
楚南嶽峻湘清人材輩出沐浴

聖主樂育涵濡之澤莫不各懷袍澤共奮功名是在教  
之於平時而決擇之於臨事也臣伏讀上年

詔曰武科之設以外場爲主其弓力強弱尤足定其優  
劣臚哉

聖言司衡者能奉以定去取庶幾百不失一矣臣本年

陳請

陛見恪奉

恩旨以於武闡事竣再行來京兢兢之心敢不精益求精勉而加勉

臣凜遵

聖訓絜量比較馬步同箭數者則擇其勝式之合度漢仗之壯偉開弓同力號者則擇其氣度之從容曳挽之滿足刀石同力號者則擇其輪舞之舒展掇抱之堅定合以內場而取中之上貢

大廷用備



採擇事既竣臣謹敘楚材之有造

聖化之廣被以弁其首

道光乙未

恩科湖南武鄉試錄序

道光十五年歲次乙未恭遇

皇太后六旬萬壽

皇上錫類延釐舉行直省文武

恩科鄉試

臣

吳榮光巡撫湖南監臨文闈事竣接考武

闈謹與提調監試進湖南學政

臣

龔維琳所錄武生七

百餘人同監射官長沙協副將黃其漢公同考試於騎  
射地球步射技勇之合式者默記雙單好字號准入內

場默寫武經臣悉心決擇先儘雙好次及單好取中武

舉侯廷魁等二十有四名如額恭繕武闈鄉試錄進呈

御覽臣例得殿言簡端臣備員楚南五閱歲舍竊溯黔

南護撫爰暨於今襄事武闈者凡五次矣任事既久糾  
察旣熟而又少曾學射於高下去取之際愈不敢稍寬  
計上年科舉甫及一年而挾一搢三而來者登選尙無  
下乘於以嘆

聖世棧樸薪樵之廣楚省衡湘鍾毓之長良材輩出不  
覺日新而月異也夫武科

盛典也

恩科尤

作人盛會也以至重至鉅之事而稍將以苟且粗畧則  
僥倖躐取者必不能膺千城禦侮之選以負科名卽司  
衡者使之負科名也故均是矢也掠靶撞靶插靶根以  
爲中非中也均是弓也閃身探首終未拽滿以爲開非  
開也均是刀也一舉一轉卽委諸地焉以爲舞非舞也  
均是石也以帛繫兩膀至掌借膀力以爲掇非掇也辨  
其非而是者始見察其僞而真者悉呈大矣哉上年

詔曰直省武場考試務當以弓力強弱分別去取弓力  
既能挽強技勇又復優嫻自稱上選

臣謹奉

聖人之教以求楚南之材不敢偏重馬射步射但求其  
一日之長尤不敢僅以狀貌魁梧遂許爲百夫之特於  
挽強命中之士絜量比較精益求精乃自上科慎簡無  
遺以後今科所得中十一二三矢而能頭號弓刀石者  
又若而人新進武生居其泰半他日或承

宿衛或備專城蓋惟

聖治光昭涵濡樂育愈積愈厚而楚材可用疏附奔奏

之彥莫不戈矛偕作上應

恩榜之旁求

臣

謹拜手稽首以觀其

盛也

五世同堂呈

大學士管理刑部事務董誥填諱

本部江西司員外郎總辦秋審吳榮光呈爲循例恭報

五世同堂呈請代奏事竊

榮光

係廣東南海縣人年四

十三歲由嘉慶四年進士改庶吉士散館授職編修十

年陞授御史疊蒙

天恩簡放浙江丁卯科鄉試副考官順天甲子科鄉試

同考官巡視天津漕務巡視中城緣事革職對品捐復

補授今職

榮光

祖母易氏現年八十七歲恭遇嘉慶四

年

覃恩曾經得受

封典生

榮光

之父濟運廩貢生候選教諭濟運生

榮光

兄弟五人長

榮光

次彌光學附生次恩光次綬光次垂

光

榮光

生子二人長尙忠次尙志今於嘉慶二十年正

月尙忠生子高禧現在五世同堂例應呈報伏念

榮光

粵壩占籍蠻序承家策名而教之忠早登芸館竊祿以  
逮所事復佐蘭臺戴

天而舉室知

恩愛日而重閭延慶際垓紘之



仁壽嘉徵已徧於海隅依

日月之光華春嘏先承於

輦下沐

帝里祥和之澤五葉桐新捧鄉關定省之書八旬萱茂  
隨父事祖祗備均

高厚之慈由祖逮元踐食總

太平之福凡此私門之慶幸悉由

昌會所生成查職官五世同堂者由任所具呈奏請

榮

光現任京員遵例取具同鄉官印結呈明伏乞據呈代

奏實爲德便

初從弟鳳髦柳塘

編輯

同懷弟彌光樸園

子尙忠春卿

校字

尙志任卿

石雲山人文集卷一止